

kino. Mehemea e ngau tuara ana tetahi ki tetahi mehemea e kawekawe korero ana, e rite ana tenei ki te rongoa whakamate o te nakahi, kia inoi tatou me Rawiri, **Tiakina toku mangai, e Ihowa.**

4. E rite ana te arero ki te *ahi*. He kapura ano hoki te arero. He iti te timatanga o te ahi, engari nui rawa te kino mehemea e kore e tupatoria. Ko te riri nui e tupu ana ki te aritarita, a ko te mutunga he kohuru. Ko tenei te kopura e tupu tonu ana nawai ra kua paa te aroha.

5. Ko te matunga: kia mahara ki tenei, ki te tiakina e te Atua te arero, e kore e rite ki te hoihoi kahore nei he paraire, e kore e rite ki te heari koi, e kore e rite ki te kapura, engari ka rite ki te pua wai hei whakahaubau i te wairua manui. I te mea i tiakina e te Atua nga ngutu o Pita i roto i te whare o Kaiapa, kahore ia i whakakahore i a Ihu. Ki te mea e inoi ana tatou ki te Atua a e tono pono tonu ana kia tiaki i o tatou ngutu, e kore e puta ake i te mangai te kupu poke, te korero teka, te korero aroha kore ranei, engari ka whakamana ra Paora kupu, "Hei runga i te aroha noa ta tatou korero i nga wa katoa, he mea kinaki ki te tote, kia matau ai koutou ki te tikanga mo te whakahoki kupu atu ki tenei tangata ki tenei tangata."

Kia mahara ki nga kupu a Horomona, "He tokomaha e whanauia ana e nga ngutu o te tangata tika." Mo tenei kia inoi tonu tatou me Rawiri, **Tiakina toku mangai, e Ihowa, tiakina te tatou o oku ngutu.**"



TE RAUKAHIKATEA.

NO te 2 o tenei marama ka whakatuwheratia te whare karakia o Te Raukahikatea e te Pihopa o Waitapu. He tokomaha nga kaumatua o Turanga nei i tae mai ki te whakatau i te powhiri a nga tamariki o te Kareti. Te moni i kohia e £32, i whakaaria e Apirana Ngata £10. Kaore i nui te tangata otira a te torutoru i tae mai he nui te kahi. Ko Peni te ua rawa to Heretaunga i tae mai. I runga i te whai korero a Te Tiatene, kai-whakaako o te Kareti, i mea ia e rua nga take i kaha ai tona whakaaro kia hanga he whare-karakia mo te Kareti: Tuatahi, hea mea tika kia timata atu te whakaako i nga minita i roto i te whare-karakia; tuarua, he mea tika hoki kia whakaturia ki te Kareti na Te Wiremu Renata nei i timata, he whakamaharata-

nga ki a ia. I whanau a Te Wiremu ki roto i te Maori a e mate ki roto i te Maori. I puta tana tono ki nga minita katoa o te Hahi o Ingarangi o te taha pakeha kia whakaaro mai ki tana inoi. Hui katoa te moni i puta mai e £320. Kia £50 kei te toe atu ka oti pai. Na te pakeha anake te nuinga o tenei moni he iti nei ta te Maori. No te wa ano e tono ana te Hahi Maori ki te pakeha, e tono ana hoki te Komiti o te Kura Kotiro i Akarana, ka rure tana tono, a, ahakoa he taumaha katoa enei tono nui atu te aroha o te iwi pakeha. I mohio hoki ia e hiahia ana te Iwi Maori ki te awahina ano i a ia. I tu mai a Rutenc te Arahi, a Peka Kerekere, a Tame Arapata me Apirana Ngata ki te whakahoki mai i nga kokero a Te Tiatene. I mea a Apirana Ngata me karanga he hui nui mo te kawanga o te whare hei whakaoti hei whakapai hoki i nga wahi he o te kareti. I tautoko te huihuinga i tenei whakaaro a i mea a Te Tiatene me ata whakaaro marie. Ki te tu he hui, a ki te nui hoki te moni me hoatu tetahi wahi mo te Kura Kotiro i Akarana. I puta nga kupu whakamihia a Apirana Ngata mo Wikitoria kareti, e kaha ana he whare pai atu. Kanui te whakamihia o te tangata ki te whare-karakia o Te Rau, kei a ia anake tona hanga. E 41 putu te roa, 16 te whanui. Ko nga toetoe o te tuarua he pereki papa. Ko te tepara tetahi mea pai atu o tenei whare, kaore he tepara hei rite; ko te wahi hei korerotanga pukapuka e whakairoa ana o te Maori. Engari ko te hanga o tenei whare i whakaritea mo te kareti ehara i te mea mo te whare karakia pariha. E whakamihia ana matou mo te kaha o Te Tiatene ki te hanga i tona whare, nana anake i tono nga moni. Ina kua tu te whare mo nga iwi katoa.

KEI te kainga o te Wiwi tetahi wahine i moe i tetahi moe tino roa. Ko Makere Poenawera tona ingoa. Ka rua tekau ona tau e moe ana kaore te oho kaore te aha. Ko te timatanga o tona moe he whiti ara he ohorere no tona marakutanga. I ora roa ai, i tae mai ai ki tenei wa e ora ana he mea whangai ki nga kai papai mama ki te huri e te puku ngoikore. No te Wenerei nei te 27 o nga ra o Mei i oho ake ai i tana moe wairangi engari torutoru nei nga haora i ora ai ka hemo i te ngoikore o te roa o tona takotoranga. He nui te whakamihia mo te manawanui o nga kai whangai i tenei wahine i te wa e moe ana ia.